

# Empat misi utama MPP USIM

BERTUNJANGKAN frasa Memacu ke Arah Mahasiswa Holistik, Dinamik dan Matang, visi utama barisan kepimpinan baru Majlis Perwakilan Pelajar (MPP) Universiti Sains Islam Malaysia (USIM), Negeri Sembilan untuk sesi 2009/2010 bermula dengan penuh semangat.

Perkara tersebut terkandung dalam ucapan dasar dalam Majlis Penyerahan Watakah Pelantikan MPP institusi ternama di Bandar Baru Nilai itu.

MPP USIM pada sesi kali ini telah menggariskan empat misi utama dalam menterjemahkan teras kepimpinan mereka. Misi tersebut meliputi kecemerlangan ilmu dan pembangunan sahsiah diri. Selain itu, cakna kebajikan mahasiswa, kepimpinan melalui teladan dan budaya inovasi serta Pengantarabangsaan.

Menurut Yang Dipertua MPP USIM, Muhammad Hilmi Juhari, bagi memastikan kecemerlangan ilmu dan pembangunan sahsiah diri dapat dihayati oleh mahasiswa USIM, MPP USIM komited menekankan budaya ilmu dalam membantu pihak universiti untuk melahirkan mahasiswa yang cemerlang secara holistik.

"Justeru, kami berhasrat untuk membudayakan intelektual mahasiswa USIM melalui seminar, konvensyen, diskusi ilmiah dan sebagainya agar dapat membuka kerangka pemikiran mahasiswa USIM ke arah mendepani isu semasa," kata Muhammad Hilmi.

Dalam usaha membudayakan inovasi dan pengantarabangsaan, barisan kepimpinan USIM tekad menyahut hasrat dan seruan kerajaan untuk memastikan peranan utama mahasiswa dalam melahirkan idea yang kreatif dan kritis dalam mencipta inovasi baru.

"Cabaran pengurangan bajet bukanlah menjadi halangan dan kekangan untuk kita melaksanakan misi inovasi dan pengantarabangsaan untuk terus maju ke hadapan," katanya.

Muhammad Hilmi tidak meletakkan kedudukannya sebagai Yang Dipertua MPP sebagai satu keistimewaan. Sebaliknya, dia menganggap ia sebagai satu cabaran dan kewajipan yang wajib dilaksanakan dengan jujur dan amanah.

"Kepimpinan yang bersandarkan kepada teladan ataupun qudwah hasanah, akan menatijahkan perancangan, penguurusan dan output yang berkesan," katanya.

Bagi memantapkan agenda dan memacu visi MPP, Muhammad Hilmi turut menamakan lima ahli majlis tertinggi yang terdiri daripada Abdullah Long sebagai Naib Yang Dipertua 1, Akalili Zubair (Naib Yang Dipertua 2), Mohd Hazimin Harun (Setiausaha Agung) dan Muhammad Tobrani Mohammad Yusof (Bendahari).

Pemilihan Majlis Perwakilan Pelajar USIM yang diadakan pada 21 Januari lalu turut memper-

bandingkan sebanyak 24 kerusi. Seramai 39 calon bertanding iaitu 24 calon bertanding untuk merebut 16 kerusi kawasan fakulti dan 15 orang calon pula bertanding untuk merebut lapan kerusi kawasan umum.

Seramai 4,360 pelajar keluar mengundi pada tahun ini menjadikan peratus kehadiran sebanyak 91.06 peratus. Seperti tahun-tahun sebelumnya, USIM terus melaksanakan pemilihan MPP secara dalam talian melalui sistem e-UNDI. Sistem ini telah diguna pakai sejak empat tahun lalu.

Majlis Penyampaian Watakah diakhiri dengan penyerahan tugas oleh Muhammad Alif Ismail, mantan Yang Dipertua MPP USIM kepada Muhammad Hilmi sebagai simbolik pertukaran pucuk pimpinan baru barisan kepimpinan pelajar.

Turut hadir, Naib Canselor USIM, Profesor Datuk Dr. Muhamad Muda, Timbalan Naib Canselor HEP dan Alumni, Profesor Datuk Dr. Mohamed Asin Dollah.



MUHAMMAD ALIF (kanan) menyerahkan fail tugas kepada Muhammad Hilmi.



BARISAN MPP USIM ketika melafazkan ikrar pada satu majlis baru-baru ini.